

Juda

JANDIKO: Juda ma owadgi Yesu

KAR NDIKO: OK ong'ere

KINDE NDIKO: 65-70 E YIK RUOTH (AD)

GIK MANIE IYE:

Ok ong'ere malong'o ni buruwani nondikne ng'a, chandruok ma Juda wuoyeka winjore malong'o. Juda jiwo jo-Kristo mondo gichung' motegno e yie ma gin-go, ne puonj mag miriambo kod jopuonj mag miriambo. E nonro marabora, Juda chiwo ranyisi kaka chon Nyasaye ne ng'ado bura kuom richo kod timbe maricho mar ngima jopuonj mag miriambo. Juda tieko wachne gi puonj ne jo-Kristo mondo ochung' motegno gi teko mar Nyasaye mabiro sirowa mondo kik wapodhi.

THORRO:

Puonj maduong' mar kitabuni en siem kuom gik ma puonj mag miriambo kelo to bende opuonjowa mondo wabed joma otang' kaka kanisa. Juda wachonwa mondo watang' gi gik ma ji wacho kod kit ngima ma gin-go mondo omi wakaw mana gik maber e wang' Nyasaye kende. Omiyo wanyalo kwayo Nyasaye mondo okonywa e ma ka wan gi adier chutho ni obiro winjowa kendo duoko lamowa.

WECHE MOCHAN KAE GIN:

1. Mos (1-2)
2. Siem kuom jopuonj mag miriambo (3-7)
3. Kit ngima marach mag jopuonj mag miriambo (8-19)
4. Puonj ne jo- Kristo (20-23)
5. Pak (24-25)

¹An Juda ma jatich Yesu Kristo, kendo ma owadgi Jakobo,

Ne joma oseluongi, ma Nyasaye Wuoro ohero, kendo ma Yesu Kristo orito.

²Mad kech gi kuwe kod hera mogundho obed kodu.

Richo Gi Kum Mar Joma Kia Nyasaye

³Osiepena mageno, kata obedo ni ne aikora ahinya mondo andiknu kuom wach warruok ma wan duto wan-go, naneno ni ber koro andiknu mondo ajiwu uked matek kuom wach yie mane ochiwne jomaler dichiel kendo mogik mondo oriti.

⁴Nikech jomoko mane osendik kuomgi chon ni bura oloyo osedonjo e dieru ling'ling'. Gin joma kia Nyasaye, ma loko

ng'wono mar Nyasachwa doko negi thuo- lo mar timo richo, kendo madagi Yesu Kristo, ma en kende e Ruodhwa mamalo chutho.

⁵Kata obedo ni useng'eyo wechegi duto to pod nyaka aparnu ni Ruoth nore- so joge mogologi Misiri, to bang'e achien nokumo joma ne ok oyie. ⁶Kata mana malaikane mane ok obedo kuondegi mag loch mane omigi, mago mane owuok oweyo keregi mane oketgie, gin bende osekanogi e mudho mandiwa, kotwegi gi nyoroche maok chodi nyaka chieng,' ka giritto kum e odiechieng' maduong'.

⁷Kamano bende Sodom gi Gomora, kaachiel gi mier moluorogi ne jochiwore ne chode gi anjowo. Gin gibedo kaka ranyisi mar joma ikumo kiwang'o e mach

manyaka chieng'.

⁸Kamano bende e kaka jolekogi bende duwo ringregi giwegi kendo kwedo loch kendo wuoyo marach kuom chwech man giduong' e polo. ⁹To kata mana Mikael malaika maduong' kane gilero gi Jachien ringre Musa, ne ok ohedhore wuoyo kuome marach ka hangone wach, to nowacho mana ni, "Ruoth mondo okw-eri!" ¹⁰Jogi to wuoyo marach gi ayany kuom gimoro amora kata mana gik ma gikia tiendgi, kendo gik ma giketore ni ging'eyo, ka le maonge rieko, magi e gik matiekogi.

¹¹Ginine malit! Giseluwo tim Kain, kendo gisemwomore e ketho mar Balaam nikech gidwaro mich, omiyo osetiekgi kaachiel gi Kora nikech giseng'anyo kaka Kora nong'anyo.

¹²Jogi gin mbelni e nyasi mau mag hera, ma gichiemo kodu ka wengegi tek, gin jokwath mapidhore kendgi! Gichalo rumbi ma yamo tero to ok kel koth kendo gichalo olemo mopidhi kinde opon bende gichalo gi yien maok nyag olemo e ndalo molemo rumoe kendo mopudh gi tiendegi, gionge tich nyandiriyo. ¹³Gin apaka mager mar nam, madhuolo buoch fupgi kendo gichalo sulwe mabayo mosekan negi kum mar mudho mandiya mosiko.

¹⁴Enoka, mane odak e tieng' mar abiriyo bang' Adam, nokoro wach kuom jogi ni, "Neuru Ruoth biro gi joge maler tara gi gana kuom tara gi gana ¹⁵mondo oyal ji duto kendo mondo okum joma richo duto kuom timbegi maricho ma

gisetimo e yo maok mi Nyasaye duong' kendo kuom weche maricho duto ma joricho mochayo Nyasaye oseyaneyego. ¹⁶Jogi gin jong'ur kendo gin jomany ketho kuom ji; giluwu dwachgi giwegi maricho, bende giwuoyo gi sunga mathoth kuomgi giwegi. Kendo giwuondo ji gi weche mamit mondo giyud gik magidwaro.

Rit Ne Luong

¹⁷To un osiepena mageno, paruru gik mane joote mag Ruodhwa Yesu Kristo okoro chon. ¹⁸Ne giwachonu ni, "E ndalo giko jo jar ji nobodie ma nolu gombogi giwegi maricho." ¹⁹Magi e joma kelo pogruok e kindu, kendo gombogi mag ringruok ema chikogi, gionge Roho.

²⁰To un, osiepena mageno, gerreuru e yie maru maler, kendo lemuru ka un ei Roho Maler. ²¹Sikuru e hera Nyasaye ka urito kech mar Ruodhwa Yesu Kristo mondo okelu e ngima mochwere.

²²Kechuru joma riwogi kiawa, ²³yudhuru jomoko kuomgi ugol e mach mondo ures ngimagi, to moko kuomgi to kechuru kutang' kendo kuluor, ka usin koda ka gi lepgi ma ringregi motop osemieno.

Pak

²⁴Ne En manyalo ritou mondo kik upodhi e richo, kendo manyalo kelou e nyim duong'ne ka uonge ketho kendo ka un gimor maduong' ²⁵mad duong' makende, gi loch gi teko, kod nyalo odogne Nyasaye Jawarwa kuom Yesu Kristo Ruodhwa, e tienge duto, sani kendo nyaka chieng! Amin.